

# Eem bieproaten mit Miene

■ „Irrekirrel!” zee ik verboasd. Der luip n jongkerel mit kraande veurbie t keukenroom. Wat zol der mit Miene wezen? k Haar al een poar keer op klok keken. Ze was, ducht mie, veul loater as aans. En nou zo mor n haile nije loper. Dat was ja nog nooit gebeurd. Weer en wind, Miene kwam.

k Zag de jong veurt hoes op n braifke kieken, veur de volgende abbenee. Hai gaf vergreld n stöt tegen de dikke tazzen, dij schaf aan zien sportfietse hongen. Dij was doar vanzult nait op berekend. Mit dij haile pakkeroazie ree e toch zo mor vot. Aan diz kaant op t voutpad ook nog. Mor ja, doar hejje teminent gain last van brommers, dij joe in de muide rieden. Zoas Miene lest.

Zol ik heur eefkes bellen? Joa, waarom nait? Ie kriegen toch noa joaren n baand mit zok soort minsen. Ze groalt ook aaltied, as ik heur op zotterdag-nommedag in de winkelstroade nait veurbie kiek. Doar binnen gounent hail gevuileg veur. Waarksters, bezörgsters en zoks wat meer zeker. Dij worden al voak genog mit de nekke aankeken. Of nait din?

Nou mout ik in tillefoonboek nait kieken bie de R van Rukwind, mor bie... Ja. „Vraauw Kuper”. Nee man, zaik is ze nait, och heden nee. „Dat kinnen wie hailendal nait hebben bie ons waark. Nee, mien fietse is stolen. Net, dou ik bie Schweertman zienent eem de loane op was. Nee, hai ston nait op slöt. Wel rekent doar nou mit bie ons in t dörp? En nou helpt ons Freek mie eem mit zien aigen fietse. Doar kin ik ja nait zo goud mit oet de vouten”.

Freek, heur ik, is heur jongste en net sloagd op schoule veur zien exoamen. Dij kin t dus mooi eem wachten. „Hou konnen ze dien fietse nou stelen? Wel kin doar belang bie hebben, bie zo'n old medel?”. „Dat mouten ie nait zeggen. Doar gaat het zokse daiven juist om, olle medellen. Dij binnen geld weerd. Ons Freek zegt, doar kin best n haile bende achter zitten. Ons nichtje Tetje, dij is in viefjaar al aan heur achtste opoe-fietse tou. Aal ofstolen. Mor ja, gain wonder, zai luit dij dingen aaltied wit schildern. Din vaalen ze juist op”.

t Wondert mie, dat Miene gain nije fietse kregen het van de kraande. Joa toch? Vin tegenswoordeg mor aine, dij joe nog ieder dag in weer en wind van dainst wezen wil. „Nee”, zegt ze, „vrouger kreeg je nog wel ais nije banden en tazzen

vergees. Mor n fietse, dij nait op slöt staait, is joen aigen bedrijfs-risico. Zo nuimen ze dat.

Lest hebben wie wel n busraaiske mit n feestoavend had. Hail schier hur. Goud wat bonnen veur drinkerijen n harteleke beet en zo. Mor wie zatten mit ons plougje bezörgsters wel net onder de verstaarkers, dou de Dolly Dots zongen. Mens nog aan tou, doar hebben ons de oren van toet. Boetendes heur ik de Grunneger meziek van Radio Noord veul laiver”.

Wat kin ik zeggen om heur moud in te spreken? „Mooi, dat joen Freek joe eem helpt. Wat n jentege sportfietse het e ja”. Dat dut heur goud, dat kin ik heuren. „Duur ik joe wel wat vroagen, mevraauw? Broeken ie ook Evi Super Vitrage Wit veur joen gediene? Nee? Zai hebben n actie, waar je 120 doamesfietsen mit vief versnellens mit winnen kinnen, als je n riemke van datteg woorden moaken. Ie kinnen dat vaast beter as ik. En aans joen man wel, dij schrift ja veur zien waark”.

Doar kin ik niks tegenin brengen, dus Miene proat nou hailendal eem bie. „Der is hier op dörp n vraauw, dij lopt ale winkels of, waar ze mor n actie mit slagzinnen en zo hebben. Dij het der slag van. Ze mout al vaar sportfietsen op zolder staan hebben, veur as heur klaainkinder der aan tou binnen. En ze het der mor twije. Mor leuf mor nait, dat ze wat votgeft. Mag ons Freek joe mörn eem zo'n fleske Evi toulangen? Din kinnen ie zult zain hou t mout”.

Dij Miene! Ze wait persies hou ze aine veur heur krodertje spannen mout. „Mor wat hest doe nou aan n sportfietse?” zeg ik. „Joen Freek het t doar mit dij dikke tazzen ook al stoer mit ja”. „Och, veur aine mit vief versnellens zel ik toch wel n opoe-fietse, dij mie paast, in stee kriegen kinnen? Actie loopt nog tot datteg september, mor ie begriepen, dat ik der veul eerder verlet om heb”.

Waar ik Miene nou al wel mit troosten kin, is n ploetje veur heur aanvragen bie Radio Noord. Wat zel ik kaizen? „Op n fietsie, op n fietsie, op n fietsie door het mooie Drentse land” liekt mie nait zo goud. Nee, din laiver de Tuutfjloeters, dij zingen ja over n kraandebezörgster. Joa man. As ik Rob van Dam ais vruig der bie te zeggen: „Het laidje Lammerdientje, spesiaal veur Kraande-Mientje”. Irrekirrel, of ik ook riemen kin!